

10 OCT 1997

MENTERI KEWANGAN ASEAN AKAN HADIRI CONFAB DAN PAMERAN KEWANGAN

KUALA LUMPUR, 10 Okt (Bernama) -- Para menteri kewangan dan pegawai-pegawai kanan ASEAN akan berkumpul di sini dari 1 hingga 3 Disember untuk pameran dan persidangan ASEAN mengenai kewangan bersempena dengan ulang tahun ke-30 pertubuhan itu.

Persidangan dan pameran yang bertemakan "Inisiatif-inisiatif kewangan ASEAN untuk abad ke-21" dianjurkan oleh Forum Perniagaan ASEAN (ABF) dengan kerjasama Sekretariat ASEAN.

Perdana Menteri Datuk Seri Dr Mahathir Mohamad dijadual akan merasmikan persidangan dan pameran itu.

Wakil-wakil kanan dari pertubuhan-pertubuhan antarabangsa seperti Tabung Kewangan Antarabangsa (IMF) dan Bank Dunia akan turut serta.

Pengarah urusan IMF, Michel Camdessus dijangka memberi ucapan pada satu sesi khas mengenai "masa depan pasaran kewangan sejagat" yang akan mengutarakan beberapa gambaran berkaitan pertumbuhan dan kedudukan inflasi dalam tahun-tahun akan datang.

Presiden Institut Kewangan Eropah, Alexandre Lamfalussy, akan bercakap mengenai "EURO 1999: kesan-kesan terhadap pertumbuhan ekonomi sejagat dan kestabilan pasaran kewangan."

Memandangkan krisis kewangan serantau baru-baru ini, persidangan itu amat bermakna kepada pembuat-pembuat dasar yang terpaksa menangani cabaran-cabaran kesejagatan dalam sektor kewangan, kata setiausaha agung Asean Datuk Ajit Singh.

-- BERNAMA

MSL SIA